

故宮博物院藏

四庫

全書

撤出本

彙編

第十二冊

故宮博物院編

故宮出版社

第十二册 目錄

南北史合注卷八十九—卷九十二 一

卷八十九 三

卷九十 一三三

卷九十一 二一三

卷九十二 三四三

欽定四庫全書

史部
南北史合注卷九十九

第三分

欽定四庫全書



南北史合注卷八十九

明李清撰

魏本紀第三

北史三

高祖孝文皇帝諱宏猷文皇帝太子也母李夫人皇興
元年八月戊申生平城紫宮神光照室天地氤氲和氣
充塞高祖潔白有異姿襁褓岐嶷長而弘裕仁孝綽然
有人君之表獻文尤愛異之三年六月辛未立為皇太

子五年受禪延興元年秋八月丙午皇帝即位于太華
前殿改皇興五年為延興丁未宋人來聘九月壬戌詔
在位及民庶進直言壬午青州高陽人封辨聚黨自號
齊王州軍討平之冬十月丁亥沃野統萬二鎮勅勒板
詔太尉隴西王源賀追擊之桡罕滅之徙其遺逆于冀
定相三州為營戶十二月乙酉封駙馬都尉穆亮為趙
郡王壬辰詔求舜後獲東萊人媯苟之後其家畢世以
彰盛德之不朽復前濮陽王孔雀本封辛丑徙趙郡王

穆亮為長樂王癸丑日有蝕之

魏書靈徵志載是月徐州士士邢德於彭城南一百
二十里得著一株四十九枝下掘得大龜獻之

二年春正月太陽蠻酋桓誕率戶內屬拜正南將軍封
襄陽王曲赦京師及河西南至秦涇西至枹罕北至涼
州及諸鎮詔假員外散騎常侍邢祐使于宋二月丁巳
詔曰頃者淮徐未賓尼父廟隔非所致令祠典寢頓禮
章殄滅遂使女巫妖覲淫進非禮自今有祭孔廟制用

酒脯而已不聽婦女雜合以祈非望之福犯者以違制
論其公家有事自如常禮柔然犯塞上皇次于北郊詔
諸將討之鹵遁走北部敕勒叛奔柔然上皇追至石磧
不及而還三月上皇至自北討戊辰以散騎常侍駙馬
都尉萬安國為大司馬大將軍封安城王庚午親耕籍
田連州敕勒謀反徙配青徐齊兗四州萬戶夏四月庚
子詔工商雜伎盡聽赴農諸州課人益種菜果辛亥宋
人來聘癸酉詔沙門不得去寺行者以公文

魏書靈徵志載是月詔曰近內外興建福業造立圖
寺然貧富之人費竭財產務存高廣殺昆蟲含生之
類苟能精致累土聚沙福鍾不朽欲建為福之因未
去傷生之業朕為民父母慈養是務一切斷之

是月宋明帝殂五月丁巳詔軍警給璽印傳符次給馬
印六月安州民遭冰雹詔丐租賑恤丙申詔今年貢舉
尤為猥濫自今所遣皆可問盡州郡之高才極鄉閭之
選戊午行幸陰山秋七月壬寅詔州郡縣各遣二人才

堪專對者赴九月講武帝親問風俗八月百濟遣使請
兵伐高麗九月辛巳車駕還宮戊申統萬鎮將河間王
問武皮坐貪殘賜死己酉詔以州鎮十一水旱丐其田
租開倉賑恤又詔流逆之人皆令還本違者徙邊冬十
月柔然犯塞及五原十一月上皇親討之將渡漠柔然
聞之北走數千里丁亥封皇叔略為廣川王壬辰分遣
使者巡省風俗問民疾苦帝每一月一朝崇光宮十二
月庚戌詔曰頃者以來官以勞升未久而代牧守無恤

人之心競為聚斂送故迎新相屬于路非所以固民志
隆治道也自今牧守溫良仁儉克已奉公者可久于其
任歲積有成遷位一級其貪殘非道侵削黎庶者雖在
官甫爾必加黜罰著之於令以為勸準詔以代郡事同
豐沛代人先配戍邊者免之是歲高麗地豆干庫莫奚
高昌等國並遣使朝貢

是歲宋泰豫元年

三年春正月庚辰詔員外散騎常侍崔演使于宋丁亥

改崇光宮為寧光宮二月

魏書載二月癸丑詔牧守令長勤率百姓無令失時
同郡內貧富相通家有兼牛通借無者若不從令一
門內終身不仕守宰不督察免所居官

戊午上皇至自北討飲至策勲告于宗廟甲戌詔縣令
能靖一縣劫盜者兼理二縣即食其祿能靖二縣者三
年遷為郡守二千石能靖二郡上至三郡亦如之三年
遷為刺史三月壬午詔諸倉屯穀麥充積者出賜貧民

夏四月戊申詔假司空上黨王長孫觀等討吐谷渾拾
寅壬子詔以孔子二十八世孫魯郡公以為崇聖大夫
給十戶以供灑掃六月甲子詔曰往年縣召秀才二人
問守宰善惡而賞者未幾罪者衆多肆法傷生情所未
忍諸為人所列者特原其罪朕可代之

魏書靈徵志載延興三年秋秀容郡婦人一產四男
四產十六男

秋七月詔河南六州民戶收絹一匹綿一斤租三十石

乙亥行幸陰山八月帝從上皇幸河西拾寅謝罪請降
許之九月辛巳車駕還宮乙亥宋人來聘己亥詔曰今
京師及天下囚未判在獄致死無近親者給衣衾棺槨
葬之不得暴露辛丑詔遣十使巡行州郡檢括五口冬
十月上皇將南討詔州郡民十丁取一充行戶租五十
石以備軍糧十一月戊寅詔以河南州郡牧守多不奉
法致令新邦百姓莫能上達遣使者觀風察獄黜陟幽
明搜揚賑恤癸巳上皇南巡至懷州所過問民疾苦賜

高年孝悌力田布帛十二月癸卯朔日有蝕之庚戌詔
關外苑囿聽民樵採是歲州鎮十一水旱丐民田租開
倉賑恤相州民飢死者二千八百四十五人妖人劉舉
自稱天子齊州刺史武昌王平原捕斬之

魏書靈徵志曰是年十二月顯祖因田鷹獲鴛鴦一
其偶悲鳴上下不去帝悵然問左右曰此飛鳴者雌
乎雄乎對曰陽性剛陰性柔以剛柔推之必雌矣帝
曰雖人鳥事別情性何殊於是禁不得畜鷩鳥

高麗契丹庫莫奚悉萬斤等國並遣使朝貢

是年宋主昱元徽元年

四年春正月癸酉朔日有蝕之丁丑太尉隴西王源賀以病辭位二月甲辰上皇至自南巡卒未禁寒食三月丁亥詔員外散騎常侍許赤武使于宋夏四月丁卯詔自今非謀反大逆干紀外奔罪止其身

魏書載夏六月乙卯詔曰下民凶戾不顧親戚一人為惡殃及合門朕為民父母深為愍悼自今以後非

謀反大逆干紀外奔罪止其身而已今德被殊方同軌將一宥刑寬禁不亦善乎

秋七月己卯曲赦仇池八月戊申大閱於北郊九月以宋人亂故詔將軍元蘭等伐蜀漢冬十月庚子宋人來聘十一月分遣侍臣循河南七州觀察風俗撫慰初附是歲州鎮十三大饑丐民田租開倉賑之

冊府元龜載是年以中書覆案上下之法遂罷之獄有大疑乃評議焉先是諸曹奏事多有疑請又口傳